



Comme nostre Seigneur Iesus fut crucifié entre deux larrons ; & de ce qui fut fait lors qu'il estoit en la Croix.

VAND Iesus fut en la place de *Golgotha* , qui vaut autant à dire que la place de Caluaire , on luy presenta à boire du vin avec myrrhe , mais il ne le prit point ; & à l'heure de Tierce (qui reuiet à neuf heures du matin à nostre mode) il fut crucifié , & l'écriteau de sa cause estoit ainsi écrit en lettres Hebraïques , Grecques & Latines , *IESVS DE NAZARETH ROY DES IUIES*. Et les soldats departirent ses vestemens en iettant fort sur iceux , pour sçauoir ce qu'en emporteroit vn chacun. Deux brigands furent avec luy crucifiez , l'vn à sa dextre , & l'autre à sa senestre. Ainsi fut accomplie l'Escriture qui dit , Il a esté tenté & mis au rang des malfaiçteurs : & ceux qui passoient luy disoient outrages , hochans leurs testes , & disans : Hé ! qui défais le Temple de Dieu , & en trois iours le réedifies , sauue toy toy mesme , & descends de la Croix. Et vn des larrons qui estoient pendus le blasphemoit , disant , Si tu es le Christ , sauue-toy toy mesme , & nous : mais l'autre répondant le tança , disant. Au moins ne crains-tu point Dieu , veu que tu es en la mesme condamnation ? & quant à nous , nous y sommes iustement , car nous receuons choses dignes de nos faits , mais certui-cy n'a rien fait de mal. Et il dit à Iesus , Seigneur aye memoire de moy quand tu viendras en ton regne. Lors Iesus luy dit , ie te dis en verité qu'aujourd'huy tu seras en Paradis.

S. Matthieu Chap. 27. S. Marc Chap. 15. S. Luc Chap. 23. S. Iean Chap. 19.